

佛說蓮華面經

上下
同卷

隋三藏法師那連提耶舍譯



清刻龍藏佛說法變相圖

佛說蓮華面經卷上

上下同卷

景九

隋三藏法師那連提耶舍譯

如是我聞一時佛住毗舍離獼猴池岸上大
重閣中如來不久當捨壽命爾時佛告阿難
我今共汝往波波城彼有長者名毗沙門德
吾欲化之阿難言唯然受如來教即隨佛行
未入彼城有跋提河佛告阿難我今疲極可
入河浴爾時世尊脫鬱多羅僧置河岸上入
河澡洗佛告阿難汝可至心觀如來身三十
二相以自莊嚴如是之身却後三月當入涅槃
復告阿難汝當更觀如來之身如優曇華
久遠乃現時時一出難出難見如是佛身過
於彼華百千萬倍難出難見如是之身却後
三月更不復現復告阿難汝當更觀如來之
身如華鬘師取貫華綫種種色華及種種香

結作華髮彼髮成已觀者歡喜如來身者三十二相八十種好以自莊嚴閻浮提金光色明燄圓光一尋如是身者却後三月當般涅槃復告阿難汝當更觀如來之身如三十三天所住之地百寶莊嚴復有種種音樂快樂彼諸天等於彼寶地及天音樂不能暫捨亦不能記彼地寶色如是佛身三十二相不可遍觀何以故觀一一相心不能捨如是身者却後三月當般涅槃復告阿難汝當更觀如來之身譬如日月有大威德神通光明在佛身邊悉蔽不現是故佛身過彼日月最尊最勝如是之身却後三月當般涅槃復告阿難譬如師子諸獸中王如天帝釋大伊羅鉢象諸象中王佛身亦爾具大勢力獨步無畏如是之身却後三月當般涅槃復告阿難汝當

更觀如來之身如須彌山王四寶所成處于大海安住不動其體堅實無有瑕隙如來之身過那羅延力百千萬倍不可爲比如是之身却後三月當般涅槃復告阿難如來之身於無足二足多足衆生有色無色有想無想非有想非無想衆生之中如來色身最尊最勝如是之身却後三月當般涅槃復告阿難如小千世界千日千月千須彌山千弗于逮千瞿耶尼千鬱怛羅越千閻浮提千四天王千三十三天千帝釋天王千燄摩天千燄摩天王千兜率陀天千兜率陀天王千化樂天千化樂天王千他化自在天千他化自在天王千梵身天千梵身天王如是小千世界滿中諸天欲見如來面貌周盡不能得見何以故如來面光如百千電燄出過世間所有光

明百千萬倍是故帝釋大梵天等常讚歎佛
光明殊勝如是之身却後三月當般涅槃復
告阿難莫作是念如來不盡貪瞋癡故自讚
已身如來身者貪瞋癡使及彼習氣永盡無
餘如是阿難如來應供正遍知有大威德汝
常供侍如來生身以是因緣所得功德不可
量不可數不可思議無量無邊阿僧祇阿難
汝今欲聞如來滅後未來衆生供養如來碎
身舍利因緣事不爾時阿難偏袒右臂右膝
著地合掌白佛言世尊今正是時大德婆伽
婆今正是時三惟願如來爲我宣說佛涅槃後
諸衆生等供養如來碎身舍利因緣等事我
聞是法至心受持廣爲他說佛告阿難汝善
諦聽我今當說阿難如來入涅槃時入金剛
三昧碎此肉身猶如芥子如是一分舍利向

諸天所爾時帝釋天王及諸天衆見佛舍利
知佛涅槃即雨天曼陀羅華摩訶曼陀羅華
曼殊沙華摩訶曼殊沙華供養舍利如見佛
身禮拜右繞有種阿耨多羅三藐三菩提善
根有種聲聞善根有種辟支佛善根有一分
舍利向龍世界中爾時娑伽羅龍王無量龍
等見佛舍利大設供養以因陀羅寶摩訶因
陀羅寶火味寶清水寶如是無量種種諸寶
持用供養碎身舍利禮拜右繞作供養已是
時龍等各自發願有發阿耨多羅三藐三菩
提願者有發聲聞菩提願者有發辟支佛菩
提願者有一分舍利向夜叉世界爾時毗沙
門王及餘無量大夜叉將見碎身舍利以種
種華末香燒香燈明音樂如是無量供養舍
利禮拜合掌右繞恭敬有發無上大菩提願

有發聲聞願有發辟支佛願彼餘舍利在閻浮提當來有王名阿輸迦統一閻浮提此王爲供養舍利故造作八萬四千塔置此舍利而供養之此閻浮提復有六萬諸王亦當供養碎身舍利以諸華鬘種種香等燈明音樂供養禮拜右繞恭敬有種無上大菩提善根有種聲聞善根有種辟支佛善根有即捨家出家於佛法中信心清淨剃除鬚髮而被法服精勤修道皆悉漏盡而般涅槃如是阿難如來應供正徧知有大威德以彼法身依生身故供養生身舍利因緣所得功德無量無邊阿僧祇不可數不可說爾時如來作如是念我此三阿僧祇劫勤苦所成佛法欲令久住於世間故當往諸天諸阿脩羅諸龍迦樓羅摩睺羅伽等所住之處付囑佛法爾時如

來即於閻浮提沒三十三天中出爾時帝釋天王見世尊已即敷高座奉迎如來白佛言世尊願受此座爾時世尊即坐其座帝釋天王與百千萬衆頂禮佛足住在一面佛告帝釋言汝今當知吾亦不久當般涅槃以此佛法囑累於汝汝當護持如是至三帝釋天王悲泣兩面拭淚而言世尊涅槃一何疾哉如來涅槃何其太速世間法眼於茲永滅如佛所教是我力分即當護持恭敬供養如來昔於兜率陀天降神母胎我於爾時與忉利衆常作守護及佛生時亦與諸天共來守護如來坐於菩提樹下破八千萬億魔軍得阿耨多羅三藐三菩提時我與諸天亦常守護佛於波羅柰鹿野苑中三轉十二行法輪時我與天衆亦常守護我今無力能使如來不入

卷九

五

涅槃無力能護爾時世尊種種說法勸喻安
慰示教利喜帝釋諸天令護佛法從天上沒
即於娑伽羅龍王宮出爾時龍王見如來至
即時敷座佛坐其座告龍王曰汝今當知如
來不久入於涅槃我以佛法囑累於汝汝當
守護無令斷絕龍王當知此龍世界有諸惡
龍多生瞋恚不知罪福爲惡卒暴破壞我法
是故我今以此佛法囑累於汝爾時龍王悲
泣雨面拭淚而言世尊我諸龍等盲無慧眼
是故今者生畜生中若佛滅後龍世界空我
等捨命不知未來當生何處諸佛如來是衆
生寶云何今者欲般涅槃世間眼滅爾時世
尊示教利喜娑伽羅王令護佛法在龍宮沒
於德叉迦龍王宮出爾時龍王爲佛敷座佛
坐其座龍王復與百萬億龍頂禮佛足却住

一面佛告龍王汝等當知如來不久入無漏
界而般涅槃今以佛法囑累於汝至心守護
爾時龍王悲泣雨面以手拭淚而白佛言如
來滅度世間眼滅諸佛如來是衆生寶若佛
滅度我今不知當生何處佛爲龍王種種說
法示教利喜即從彼沒於黑色龍王宮中出
爾時龍王爲佛敷座佛坐其座黑色龍王與
百萬億龍衆頂禮佛足却住一面佛告龍王
汝等當知如來不久入般涅槃我以佛法囑
累於汝汝當至心而守護之爾時龍王悲泣
雨面拭淚而言如來滅度世間眼滅諸佛如
來是衆生寶若佛滅度我今不知當生何處
佛爲說法示教利喜即從彼沒於夜叉世界
出爾時毗沙門王爲佛敷座佛坐其座毗沙
門王與百萬億夜叉之衆頂禮佛足却坐一

面爾時毗留勒叉天王與百萬億鳩槃荼衆
 頂禮佛足却坐一面爾時毗留博叉天王與
 百萬億諸龍之衆頂禮佛足却坐一面爾時
 提頭賴吒天王與百萬億乾闥婆衆頂禮佛
 足却坐一面爾時大夜叉將般脂迦槃折邏
 旃荼婆多耆利子摩跋多摩尼跋陀富那跋
 陀如是一切諸夜叉將頂禮佛足却坐一面
 爾時佛告四大王及夜叉將乾闥婆將鳩
 槃荼將諸龍將言汝等當知如來不久入般
 涅槃我以佛法囑累於汝當好守護第二第
 三亦如是說汝等當知夜叉國中諸惡夜叉
 鳩槃荼國惡鳩槃荼乾闥婆國惡乾闥婆諸
 龍國土有諸惡龍如是衆生多起瞋恚不知
 罪福爲惡卒暴破我三阿僧祇劫勤苦所修
 無上佛法是故我今囑累汝等時四天王及

夜叉將乃至龍將悲泣雨面拭淚而白佛言
 世尊涅槃何其太速如來滅度一何疾哉爲
 死摩竭之所吞噬爾時世尊種種說法示教
 利喜即從彼沒閻浮提出爾時世尊作如是
 念我所作事今已作竟諸惡衆生今已調伏
 可入安隱寂滅涅槃佛告阿難生死可厭吾
 今不久欲入涅槃爾時阿難生大苦惱悲泣
 雨面如箭入心悶絕倒躄宛轉于地而作是
 言世尊涅槃何其太速如來滅度一何疾哉
 世間眼滅我復更當與誰持鉢更復持扇在
 誰邊立不復更聞甘露之法誰復與我說甘
 露味我今更復隨誰後行不復更見殊勝日
 月圓滿之面尊者舍利弗等大智慧人已入
 涅槃而佛如來今復滅度世間闇冥失智慧
 眼智須彌王今欲崩散佛樹欲倒法橋欲絕

法船欲沉法炬欲滅正法日月將墜於地解脫之門今欲閉塞三惡道門今將欲開三阿僧祇劫所集法聚將沒不久爾時佛告長老阿難汝莫憂愁莫復啼哭莫大叫喚椎胸哽噎悶絕躋地何以故世間生者是有爲法會歸無常欲令此法不失不壞而常住者無有是處爾時世尊種種說法安慰勸喻示教利喜囑法藏已默然而住爾時世尊復作是念阿難比丘爲憂愁刺深入其心我今當拔彼憂愁刺告阿難言汝今欲見未來事不我見來世如觀現在當爲汝說爾時阿難偏袒右肩右膝著地合掌向佛頂禮佛足而白佛言大德世尊當爲我說今正是時我聞法已當奉受持廣宣流布佛告阿難諦聽至心我今當說阿難未來之時有諸破戒比丘身著袈

裟遊行城邑往來聚落住親里家彼非比丘又非白衣畜養婦妾產育男女復有比丘住婬女家復有比丘婬比丘尼復有比丘貯畜金銀造作生業以自活命復有比丘通致使驛以自活命復有比丘專行醫藥以自活命復有比丘圍碁六博以自活命復有比丘爲他卜筮以自活命復有比丘爲他呪彼死屍令起遣殺怨家以自活命復有比丘爲他誦呪驅遣鬼神多取財物以自活命復有比丘專行殺生以自活命復有比丘住僧伽藍私自費用佛法僧物以自活命復有比丘內實犯戒外示護持受人信施復有比丘雖不破戒而懷慳惜衣服飲食及以鄙恡衆僧之物不與客僧復有比丘雖不破戒恡惜衆僧房舍牀座不與客僧復有比丘雖不破戒爲諸

檀越供養禮拜多得財利其心不欲令餘比丘受人信施惟欲自受復有比丘實非羅漢而常詐稱得羅漢果欲令人知我是羅漢復有比丘多受檀越四事供養內無實德惟增貪心但爲活命不爲修道復有比丘興利賈賈以自養活復有比丘專行偷盜以自養活復有比丘畜養象馬馳驢牛羊乃至賣買以自養活復有比丘販賣奴婢以自養活復有比丘屠殺牛羊以自養活復有比丘受募入陣征戰討伐多殺衆人以求勲賞復有比丘穿窬牆壁盜他財物以自活命復有比丘專行劫奪攻破城邑及與聚落以自活命復有比丘毀壞佛塔取其寶物以自活命如是無量地獄因緣捨命之後皆墮地獄阿難譬如師子命絕身死若空若地若水若陸所有衆

生不敢食彼師子身肉惟師子身自生諸蟲還自散食師子之肉阿難我之佛法非餘能壞是我法中諸惡比丘猶如毒刺破我三阿僧祇劫積行勤苦所集佛法阿難譬如有人入於大海至寶渚中多取寶物置於船上欲度大海於中沉沒佛之正法如彼寶船當來破戒諸惡比丘多樂造作種種惡業滅我佛法沉沒不現阿難如來涅槃不久之間正法當亂正法亂已復有種種諸惡比丘出現於世不信如來得證無漏寂滅涅槃況復信有世間餘人得阿羅漢入涅槃者阿難如來所有正法名味句義所謂修多羅祇夜輶迦曷羅伽陀憂陀那尼陀那阿波陀那伊帝鼻利多伽闍多迦毗佛略阿浮陀達摩優婆提舍十二部經爲惡比丘之所毀滅彼諸人等樂

作文章綺飾言辭多有如是諸惡比丘破我佛法爾時阿難白佛言世尊當來之世如是破戒諸惡比丘而出生耶佛言如是如是阿難未來之世當有如是諸惡比丘出現於世雖被法服剃除鬚髮破我佛法爾時阿難作如是念以佛力故可令我見未來之世如是事不爾時如來以神通力即令阿難悉見未來諸惡比丘以兒坐膝置婦其傍復見種種諸非法事爾時阿難見此事已心大怖畏身毛皆豎即白佛言世尊如來速入涅槃今正是時何用見此未來之世如是惡事佛告阿難汝意云何如來向說諸惡比丘惡業果報豈是餘人所能知不阿難白佛言世尊唯有如來乃能知此未來之世諸惡業報佛言善哉善哉阿難實如汝說唯有如來乃能知之

阿難汝今頗見佛未涅槃諸惡比丘圍繞如來爲說法不阿難白言無如是事佛言阿難善哉善哉如汝所說如來現在實無如是諸惡比丘圍繞如來佛爲說法佛言阿難未來之世多有在家白衣得生天上多有出家之人墮於地獄餓鬼畜生復告阿難善惡之業終不敗亡我於過去曾作賣主入於大海活多人故手殺一人以是業緣乃至成佛猶尚身受金鋸之報爾時帝釋天王與三十三天衆疾至佛所頂禮佛足却住一面皤摩天王與百萬億皤摩天衆疾至佛所頂禮佛足却坐一面刪兜率陀天王與百萬億刪兜率陀天衆疾至佛所頂禮佛足却坐一面化樂天王與百萬億化樂天衆疾至佛所頂禮佛足却坐一面他化自在天王與百萬億他化自

在天眾疾至佛所頂禮佛足却坐一面爾時
毗摩質多羅阿脩羅王與百萬億阿脩羅眾
疾至佛所頂禮佛足却坐一面爾時娑伽羅
龍王與百萬億龍眾疾至佛所頂禮佛足却
坐一面皆於一念一剎那一無虛律多頃諸
天阿修羅迦樓羅乾闥婆緊那羅摩睺羅伽
等於虛空中遍滿十二由旬皆為最後見如
來故爾時佛告阿難此道場菩提樹最勝殊
妙過去諸佛皆於此處證阿耨多羅三藐三
菩提未來諸佛亦於此處得阿耨多羅三藐
三菩提現在我身又於此處破十八億魔軍
得阿耨多羅三藐三菩提如是阿難我今不
久當般涅槃復次阿難藍毗尼園最勝最妙
是佛如來最後生處復次阿難摩耶夫人是
大福德乃能生出人中之寶復次阿難淨飯

國王是大福德乃作一切諸眾生中最勝寶
父復次阿難毗舍離城比者離國最勝最妙
王舍大城摩伽陀國最勝最妙七菴婆囉樹
處亦勝亦妙瞿耽摩若尼俱陀樹處亦勝亦
妙裴囉多豆囉多豆羅尼憇處亦勝亦妙力
士生地乃是過去轉輪聖王解寶天冠在此
安置辟支佛塔是我焚身最勝妙地復次阿
難此閻浮提最勝好處眾生於中樂食壽命
是故我今於此涅槃我於三阿僧祇劫所集
之法不久當滅爾時世尊慰喻阿難令心歡
喜除其愁刺付囑法已告阿難言吾今與汝
可往諸國阿難唯然受如來教爾時世尊至
波波城所應度者皆悉度訖復往諸國教化
無量百億那由他眾生皆成就已爾時阿難
隨從佛行如是次第至摩伽陀國道場菩提

之樹世尊繞樹行六匝已即於樹下結跏趺坐佛告阿難如來不久後十五日當般涅槃爾時諸天阿修羅迦樓羅乾闥婆緊那羅摩睺羅伽等作如是念如來不久於十五日當般涅槃我等皆當最後禮拜佛告阿難莫作是念謂佛世尊有貪瞋癡讚歎於此閻浮提處而如來者離貪瞋癡此三界處是衆生生處於三界中而此欲界是諸衆生習三惡業又造人身及與天業色界無色界業乃至非想非非想業說此語已佛起于座即時此地六種震動無量百千萬億那由他諸天於虛空中憂愁啼哭作如是言如是衆生中寶不久當滅

佛說蓮華面經卷上

佛說蓮華面經卷下

隋三藏沙師那連提耶舍譯

爾時世尊離菩提樹毗沙門王共百萬億夜叉之衆同時舉聲悲啼雨淚以手拭淚而說偈言

如來容色甚微妙 第九 超勝衆生無比者 十三

如是莊嚴殊特身 不久之間當滅度

爾時帝釋天王復與百千億三十三天衆同時舉聲悲泣雨淚以手拭淚而說偈言

如來面相正圓滿 形色殊勝於日月

一切人天應供者 我等不復得瞻見

爾時須臾摩天王與百萬億須臾摩天衆同時舉聲悲泣雨淚以手拭淚而說偈言

人中精進最雄猛 威力能破諸魔軍
甘蔗種中釋師子 今爲無常所食噉

爾時刪兜率陀天復與百萬億刪兜率陀天衆同時舉聲悲泣雨淚以手拭淚而說偈言

見者無厭如藥王 出世猶如大明燈
如是智眼今滅度 世間當復皆闇冥

是時化樂天王復與百萬億化樂天衆同時舉聲悲泣雨淚以手拭淚而說偈言

安步不動勝師子 面貌圓滿過月形
更不履行於此地 千輻相跡不復見

是時魔王他化自在天主心大歡喜安隱快樂復與百萬億他化自在天衆疾至佛所合掌向佛而說偈言

諸惡衆生已調伏 大羸瘠盡無有餘
何故猶住於世間 惟願如來速涅槃

是時大梵天王瞋彼魔王作如是言咄哉魔王大惡衆生諸佛如來是最勝寶汝今云何

欲令世尊速入涅槃爾時大梵天王復與百萬億諸梵天衆同時舉聲悲泣雨淚以手拭淚而說偈言

於此現在及未來 梵天世界餘天處
初未曾見如佛身 清淨滿足端嚴面

卷九

十四

爾時毗摩質多阿修羅王復與百萬億阿修羅衆同時舉聲悲泣雨淚以手拭淚而說偈言

佛色功德無有量 無有能盡其邊際
利益脩羅及餘趣 今若滅度世間空

是時娑伽羅龍王與百萬億諸龍衆等同時舉聲悲泣雨淚以手拭淚而說偈言

伊羅鉢象數滿千 不比如來一節力
如是大力雄猛者 今爲無常所破壞
是時毗留勒叉天王與百萬億鳩槃荼衆同

時舉聲悲泣雨淚以手拭淚而說偈言

南無大覺妙蓮華 從彼清淨戒池生

示現無常不久相 今當傾墜永寂滅

是時毗留博叉天王與百萬億諸龍衆等同時舉聲悲泣雨淚以手拭淚而說偈言

如來面形如滿月 光明照曜猶日輪

如是不久住於世 示爲無常所吞食

是時毗沙門天王與百萬億夜叉衆同時舉聲悲泣雨淚以手拭淚而說偈言

佛身金色最殊妙 三十二相自莊嚴

卷九

十五

不久當爲無常力 破壞清淨大牟尼

爾時提頭賴吒天王與百萬億龍衆同時舉聲悲泣雨淚以手拭淚而說偈言

如來色身甚希有 於三界中無有比

如是不久當滅度 爲彼無常之所縉

爾時大夜叉將名般脂迦與百萬億夜叉衆
等同時舉聲悲泣雨淚以手拭淚而說偈言
佛聲殊勝踰梵天 出過迦陵頻伽聲
如來不久當涅槃 不復更聞甘露法
爾時夜叉大將名般遮羅與百萬億夜叉衆
等同時舉聲悲泣雨淚以手拭淚而說偈言
世尊金色光明身 功德莊嚴滿月面
眉間白毫殊特相 我今最後歸命禮
爾時大夜叉將摩尼跋陀羅與百萬億夜叉
衆等同時舉聲悲泣雨淚以手拭淚而說偈
言

三十有二上妙相 八十種好自莊嚴
當爲無常金剛主 摧碎大聖牟尼尊
爾時大夜叉將富那跋陀與百萬億夜叉衆
等同時舉聲悲泣雨淚以手拭淚而說偈言

過去世中一切佛 及以未來諸世尊
大力釋種師子王 無常師子之所害
爾時大夜叉將摩侯利地迦與百萬億夜叉
衆等同時舉聲悲泣雨淚以手拭淚而說偈
言

我今最後見牟尼 於是不復更奉覲
最後禮佛千輻輪 丘墟悉平脚足者
爾時大夜叉將佉陀羅迦與百萬億夜叉衆
等同時舉聲悲泣雨淚以手拭淚而說偈言
咄哉大惡無常相 破壞一切諸衆生
景九
如是衆生無上寶 亦入寂滅不久住
十六

爾時大夜叉將名金毗羅與百萬億夜叉衆
等同時舉聲悲泣雨淚以手拭淚而說偈言
我今歸依禮佛樹 生於持戒大地中
乃爲無常之斧鉞 不久斫倒大牟尼

爾時大夜叉將娑多姑利與百萬億夜叉衆
悲泣雨淚以手拭淚而說偈言

眉間白毫相 照耀如月輪 目淨如青蓮
希有不復見

爾時地神天與百萬億夜叉衆悲泣雨淚以
手拭淚而說偈言

我今禮雄猛 人中最殊勝 兩足中最上
南無大牟尼

爾時菩提樹天悲泣雨淚以手拭淚而說偈
言

此處破魔王 及破魔眷屬 大牟尼不久
無常魔所滅

爾時祇林神悲泣雨淚以手拭淚而說偈言
祇洹林當空 竹林亦如是 無常坑極深
如來入不現

爾時金剛密迹與百萬億夜叉衆悲泣雨淚
以手拭淚而說偈言

如是最勝城 亦是大豐地 捨釋迦種姓
當向何方所

爾時藍毗尼林神悲泣雨淚以手拭淚而說
偈言

淨飯國王先已滅 摩耶夫人亦滅度
如來今欲入涅槃 如是寂滅不可見

爾時迦毗羅城神疾至佛所悲泣雨淚宛轉
在地作如是言如來涅槃何期太速世尊涅槃
一何疾哉世間眼滅而說偈言

藍毗尼園佛生處 長大在於迦毗城
其光出過於千日 今最後見更不見

爾時菩提樹神與諸天阿脩羅迦樓羅緊那
羅摩睺羅伽於虛空中出大音聲悲啼號哭

而作是言佛是衆生最勝之寶不久當沒爾時世尊出于梵音而告諸天阿脩羅迦樓羅乾闥婆摩睺羅伽衆言汝等莫啼莫作異語莫生憂惱以手椎胸令心迷悶何有世間而受生者因緣和合有爲之法而得久住若欲強令無常之法不滅壞者無有是處爾時世尊示教利喜諸天阿脩羅迦樓羅乾闥婆摩睺羅伽等生歡喜已是時諸天乃至摩睺羅伽等右繞世尊還向本處佛告阿難我昔於彼阿波羅龍王處記罽賓國我涅槃後其國熾盛安隱豐樂如鬱怛羅越佛法熾盛多有羅漢而住彼國亦有無量如來弟子此閻浮提所有羅漢皆往彼國猶如兜率天處如來所有名身句身謂

修多羅 祇夜 鞞迦曷羅那 伽他 優

陀那 尼陀那 阿波陀那 伊帝鼻利多
劍 伽闍多迦 裴富略 阿浮陀達摩
優波提舍

彼諸羅漢結集如來十二部經廣造諸論彼罽賓國猶如帝釋歡喜之園亦如阿耨清涼之池復有頗羅墮逝賓頭樓等皆樂住彼罽賓國土不退佛乘阿羅漢等亦住彼國復有因陀羅摩那阿羅漢白項阿羅漢等復於如來所說法藏有漏無漏之法皆悉撰集廣行流布阿難我涅槃已最後法身彼等建立於未來世復有金毗羅等五諸天子生罽賓國廣令我法流布於世大設供養我諸弟子於閻浮提初未曾有如是大會佛告阿難於未來世罽賓國土當作如是大法之會阿難彼五天子滅度之後有富蘭那外道弟子名蓮

華面聰明智慧善解天文二十八宿五星諸度身如金色此大癡人已曾供養四阿羅漢當供養時作如是誓願我未來破壞佛法以其供養阿羅漢故世世受於端正之身於最後身生國王家身為國王名寐呾曷羅俱邏

景九

十九

而滅我法此大癡人破碎我盜既破盜已生於阿鼻大地獄中此大癡人命終之後有七天子次第捨身生罽賓國復更建立如來正法大設供養阿難以破盜故我諸弟子漸汗淨戒盜初破時諸比丘等雖汗清淨戒智如牛王能破外道經第二時此閻浮提諸比丘等破清淨戒樂作不善身行偷盜耕田墾植多貪貯畜好衣好食不樂讀誦修多羅毗尼阿毗曇如是阿難樂讀樂誦智慧之人悉皆滅度是時多有諸比丘等諂曲嫉妬多起非

法以諸比丘不如法故諸國王等不依王法以王不如王法治故其國人民多行增上十不善業以惡業故此地多生荆棘毒草土沙礫石阿難當於爾時此閻浮提五種精味失力失味所謂酥油鹽石蜜蜜如是五種失味故爾時衆生復更多行增上惡業以其多行惡不善故佛破碎盜當至北方爾時北方諸衆生等見佛破盜大設供養以種種華燒香塗香燈明華鬘種種音樂供養此盜有發阿耨多羅三藐三菩提心者有發聲聞心者有發辟支佛心者彼破碎盜當向波羅捺多國彼國人民見佛碎盜以種種華燒香末香塗香燈明華鬘種種音樂供養此盜有發阿耨多羅三藐三菩提心者有發聲聞心者有發辟支佛心者阿難此佛碎盜以佛力故亦

是衆生善根感故我此碎盃自然還復如本
不異於後不久我盃即於閻浮提沒現於娑
伽龍王宮中當沒之時此閻浮提七日七夜
皆大黑闇日月威光悉不復現地大震動惡
雷掣電於虛空中而出惡聲黑風卒起極大
怖畏天人阿脩羅迦樓羅乾闥婆摩睺羅伽
等皆大號哭泣下如雨如是阿難此盃當爾
初沒之時如來法律亦沒不現爾時魔王見
法律滅心大歡喜心大安隱於虛空中作如
是言瞿曇法滅我當教化諸衆生等自作諸
惡亦教化作以魔教故城邑聚落遞相殺害
爾時魔王以教衆生廣作惡故生身陷入阿
鼻地獄爾時娑伽羅龍王見佛盃已以種種
寶因陀尼羅寶摩訶尼羅寶火珠寶清水寶
如是大寶大設供養至于七日禮拜右繞是

諸龍等有發無上菩提心者有發聲聞心者
有發辟支佛心者爾時娑伽羅龍王以手捧
盃而說偈言
諸相莊嚴手 受種種味食 盛置於此盃
如是持用食

佛告阿難如是我盃於娑伽羅龍王宮沒於
四天王宮出爾時四天王毗留勒叉毗留博
叉毗沙門提頭賴吒七日七夜大設供養以
種種華種種華鬘種種塗香種種燒香種種
燈明種種音樂供養禮拜已時諸天衆有發
無上菩提心者有發聲聞心者有發辟支佛
心者爾時毗留勒鳩槃荼王以手捧盃而說
偈言
如來最後食 在於鐵師家 盃爲化衆生
而來於此處

佛告阿難如是我盃過七日已於四天宮沒
三十三天宮出爾時佛摩耶夫人見佛盃
已憂愁苦惱如箭入心難可堪忍宛轉于地
猶如圓木作如是言如來涅槃一何疾哉修
伽陀滅何其太速世間眼滅佛樹傾倒佛須
彌山崩佛燈亦滅法泉枯竭無常魔日萎佛
蓮華爾時佛摩耶夫人以手捧盃告於一
切諸天阿修羅迦樓羅乾闥婆緊那羅摩睺
羅伽等言諸天諦聽此是釋迦如來常受用
盃第一勇猛面貌圓滿過日月者影現此盃
復次諸天如是之盃復於王舍大城之中受
於尸利掘多毒食諸天諦聽釋迦牟尼大雄
猛者滿腹城內修摩伽陀家用此盃食諸天
諦聽如來爲化憂樓毗羸迦葉及大毒龍以
彼惡龍內此盃中諸天諦聽以業緣故於裴

連多國四月之中復以此盃受馬麥食天衆
諦聽釋迦如來以大悲故復以此盃受於最
下極貧者食諸天諦聽釋迦如來復以此盃
於娑伽羅龍王宮內受種種食諸天諦聽釋
迦如來於夏四月復以此盃受我等食諸天
諦聽釋迦如來復以此盃覆於訶利鬼母最
小之子名必利鹽迦羅夜叉以其惡心常食
人血故調伏之于時佛摩耶夫人以手捧
盃而說偈言

隨佛心欲受 皆入於盃中 佛於我腹內

卷九

三三

滿足於十月

爾時帝釋天王七日七夜以種種天華天香
天栴檀香大設供養禮拜右繞作是供已時
諸天衆有發無上菩提心者有發聲聞心者
有發辟支佛心者爾時天王以手捧盃而說

偈言

今此殊勝盃 能長衆生智 佛身亦如是
成就諸功德

佛告阿難如是我盃過七日已於三十三天
中沒燄摩天中出爾時燄摩天主見佛盃已
七日七夜種種供養以天曼陀華天栴檀香
種種華種種音樂供養佛盃禮拜右繞是時
諸天有發無上菩提心者有發聲聞心者有
發辟支佛心者爾時燄摩天主以手捧盃而
說偈言

千萬億衆生 見盃皆歡喜 能生勝妙果
牟尼使來此

佛告阿難如是我盃過七日已於燄摩天沒
兜率陀天出爾時兜率陀天王見佛盃已七
日七夜以天曼陀華摩訶曼陀華及餘種種

妙華種種香種種音樂大設供養禮拜右繞
以手捧盃而說偈言

上中下衆生 佛起慈悲心 此盃受食已
佛使至於此

佛告阿難如是我盃過七日已於兜率天沒
化樂天出爾時化樂天王見佛盃已七日七
夜以種種天華種種天香種種天音樂大設
供養禮拜右繞是時天衆有發無上大菩提
心者有發聲聞心者有發辟支佛心者爾時
天王以手捧盃而說偈言

希有大導師 悲愍於衆生 爲利衆生故
使盃來於此

佛告阿難時諸天阿脩羅迦樓羅乾闥婆緊
那羅摩睺羅伽以天曼陀華摩訶曼陀華及
餘種種華種種香天栴檀香末香供養盃已

即以此盃送至娑伽羅龍王宮中佛言阿難
此閻浮提及餘十方所有佛盃及佛舍利皆
在娑伽羅龍王宮中佛告阿難如是我盃及
我舍利於未來世於此地沒直過八萬由旬
住金剛際阿難我今語汝未來之世諸衆生
等壽命八萬四千歲時彌勒如來應供正遍
知三十二相八十種好身紫金色圓光一尋
其聲猶如大梵天鼓迦陵伽音爾時我盃及
我舍利從金剛際出至閻浮提彌勒佛所盃
及舍利住虛空中放五色光所謂青黃赤白
玻瓈雜色如是阿難彼五色光復至其餘一
切天處到彼天已於其光中出聲說偈言
一切行無常 一切法無我 及寂滅涅槃
此三是法印
其光復至一切地獄而說偈言

一切行無常 卷九 一切法無我 三十四 及寂滅涅槃
此三是法印
佛告阿難佛盃舍利所放光明復更至於十
方世界於其光中而說偈言
一切行無常 一切法無我 及寂滅涅槃
此三是法印
佛告阿難如是我盃及我舍利所放光明十
方世界作佛事已還至本處在於舍利佛盃
之上於虛空中成大光明雲蓋而住阿難舍
利及盃現大希有如是等事現此神通希有
事時八十百億衆生得阿羅漢果千億衆生
剃髮出家信心清淨一萬衆生發阿耨多羅
三藐三菩提心皆不退轉阿難此盃舍利廣
行教化諸衆生已於彌勒前虛空中住爾時
彌勒佛以手捧盃及佛舍利告諸天人阿脩

羅迦樓羅乾闥婆緊那羅摩睺羅伽言汝等當知此蓋舍利乃是釋迦牟尼如來雄猛大士信戒多聞精進定智之所熏修汝等當知釋迦牟尼雄猛大士能令無量百千那由他億諸衆生等住涅槃城出過優曇鉢華百千

卷九

二十五

億倍蓋及舍利故來至此爾時彌勒三藐三佛陀爲我此蓋及我舍利起四寶塔以舍利蓋置此塔中爾時彌勒佛及諸天人阿脩羅迦樓羅乾闥婆緊那羅摩睺羅伽等大設供養恭敬禮拜蓋舍利塔佛告阿難如來應供正遍知舍利及鉢有大威德阿難汝以給侍如來生身所生功德無量無邊不可思議阿僧祇爾時佛爲阿難說未來事已復告阿難吾當與汝往諸國土如來不久却後七日當入涅槃阿難白佛言唯然受教爾時佛與阿

難次第至諸國土城邑度脫無量百千萬億那由他諸衆生已往鐵師子純陀之家此是如來最後食處爾時世尊受其食已而說偈言

我今最後食 在於純陀家 如是五衆身 不久當滅度

爾時佛與阿難至拘尸那城種種方便教化拘尸那力士已從拘尸那城出至憂波跋多那娑羅雙樹間爾時世尊北首而目時須跋陀羅來至佛所頂禮如來向佛而坐佛爲說法得阿羅漢果

佛說蓮華面經卷下

音釋

綫私箭切 隙乞逆切 拔無粉切 噬時制切
躡與線同切 穿穿昌錄切 實實也切 鞞時制切
鏑七羊同切 羅魯何切 憩去制切 縑古法切 墟丘居切
丘也切 鉞大斧切 姑巨乙切 廟梵語也此云
切也切 支指移切 邏郎佐切 孟北末切 萎邕危切 羸羸也切